

Grace Bareño na Promer Ministro Discurso di Gouverneur no ta cuadra cu su posicion

ORANJESTAD(AAN)— Den un carta cu Grace Bareño, miembro di Parlamento, a manda pa Promer Ministro Eman e ta trece dilanti, cu na mas cu un ocasion Gouverneur di Aruba den su discursonan na ocasionnan publico, a acudi na partidonan di oposicion den Parlamento na un forma cu no ta cuadra cu su posicion di organo independiente y separa di tur partido politico.

MEP a lamenta e forma di proceder aki pero te awe, pa respet pa e funcion, a abstene su mes di duna comentario.

Bareño ta sigui muestra cu sin embargo, atrobe e biaha aki na ocasion di celebracion di Himno y

Bandera dia 18 di Maart, Gouverneur den sudcurso a haci declaracionnan cu ta empugna na su status di organo independiente y imparcial.

Respetando e funcion Gouverneur, Bareño no a dirigi su critica contra Gouverneur, pero si na e Ministronan na kende e ta responsable, den cuadro di su funcion como Hefe di Gobierno di e pais.

Bareño ta muestra ariba e partinan di discurso di Gouverneur cu a trece dilanti cu Status Aparte ta bon cubri y funda ariba un gobernacion democratico. Na su parecer, esaki no ta cuadra cu e realidad politico actual. Bareño ta bisa cu ta un hecho bon conocido cu Gabinete Eman ta

worde sosteni pa solamente siete asiento di un partido politico, AVP, cu ayudo di cuatro independiente, kendenan no ta respalda pa un partido politico cu a participa na e ultimo eleccion. Hunto e diezun representantenan aki den Staten no ta forma un mayoria di e votonan cu a worde deposita den e eleccion di 22 di November 1985.

Mustando ariba e parti caminda Gouverneur Tromp a papia di atakenan cu ta worde lanza, Bareño ta bisa cu den e parti aki claramente ta worde acudi na e partidonan den oposicion ora ta papia di rumores, sospechonan, atakenan personal, critica destructivo y

bao nivel.

Bareño ta bisa cu ta intolerable y cu un mandatario mester evita den su proceder como tal hasta e apariencia mas minimo cu e por ta inclina na un otro coriente politico den comunidad.

MEP como partido den oposicion a lamenta e a condena e hecho cu Gouverneur un bez mas a laga su funcion worde usa pa lanza criticanan infunda den direccion di oposicion particularmente MEP.

Bareño por lo tanto ta exige pa en concreto word demostra cu hechos y datos na cual ocasionnan partido MEP a haci su mes culpable na lanza sospechonan y atakenan personal, manera a worde treci dilanti pa Gouverneur.

E ta remarca tambe cu Gouverneur a papia di un minoria resonante den oposicion. Esaki sigur no por ta un indicacion na MEP cu awe ta refleha e mayoria resonante den e

pueblo di Aruba. Pesey Bareño ta añadi cu e declaracion tampoco ta cuadra cu realidad y ta duna un mal refleho ariba e posicion imparcial di Gouverneur.

Bareño ta di opinion cu Ministro presidente, como cabezante di e Gabinete cu ta ser responsabiliza pa e actonan di e Gouverneur, mester ta mas cauteloso y pone mas atencion na loke Gouverneur ta trece dilanti den publico ariba tereno politico.

E ta di opinion cu seguramente den un pais joven manera Aruba tur loke ta posible mester worde haci pa implanta respet pa organonan estatal.

E respet aki mester worde mercedi y refleha den actuacion y proceder di e instancianan aki.

E ta pidi Ministro Presidente pa haci tur loke ta na su alcance pa e caso nan aki no haya repeticion.



Ayera tardi a tuma lugar spantenbier pa e reconstruccion di e edificio na Eagle den cual lo ser estableci e seccionnan administrativo, y Research and Planning di e Direccion di Turismo. Dijkhoff Contractors ta e contratista cu lo percura pa e restauracion di e edificio na un suma total di fls. 866,480, - y cual proyecto mester ser entrega dentro di 165 dia di trabao, segun calculacionnan haci esaki lo ta pa luna di September proximo.

Ministro di Obras Publicas, Drs. F.A.J. Booi tabata presente na e actonan ceremonial di e spantenbier, restauracion di e edificio na Eagle pa e direccion di turismo.

5 Luna pa labador di auto

ORANJESTAD (AAN)—

E homber di 27 aña Isidro Narciso B. a presenta dilanti mesa berde na corte di justicia pa dos delito cu el a comete tanto aña pasa como na cuminsamento di e aña aki.

Isidro a nace na Curacao na aña 1961 y ta sin trabao fiho, pero e ta lora su man cu labamento di auto ariba caya.

Fiscal Mr. Lugo, a declara cu e homber aki, esta Isidro a ser acusa di 2 hecho, dia 26 di Augustus 1987, su so of cu otro hende a drenta cas na Siribana y a horta bebida, algun otro cos y un radio cassette door di drenta e cas forzando un porta.

Dia 3 di Januari 1988 el a trata di drenta den La Comonidad door di forza un bentana, pero el a ser atrapa pa polis.

Isidro a trece un bon defensa dilanti apesar cu e tabata tin un Abogado den persona di Mr. Offringa.

E labado di auto a para ariba cu e no sa di nada

cu a radio a ser horta ya cu ta serca un tal F. e la cumpre y ta ora cu recherche a detene nan a bise cu e tin un radio horta den su poder.

Isidro a nenga redondamente cu el a drenta e cas aki.

E robo a tuma lugar entre 3,30 pa 4or y 30 di marduga, segun declaracion di e doño di e radio.

E otro caso cu ta intento di horta den La Comonidad, e homber a bisa cu enberdad e la intenta den buracheria, pero polis a atrape.

Segun juez den e caso anterior esta di e radio cassette, el a bisa un tal Richardson cu tabata sera hunto cune, cu ta e mes a horta e radio, pero e la gaña recherche cu e no sa ta kende.

Den caso di La Comonidad, Isidro a usa martilio y screwdriver pa por a kita e waya dilanti di e bentana.

Segun Isidro ta bebida e kier a horta den e lugar aki y no placa.

Fiscal ta haya cu tin suficiente prueba den e caso di e delitonan ariba menciona y como tal un castigo di 5 luna incondicional ta na su lugar teniendo na cuenta cu e acusado tabata tin un castigo condicional di 5 luna ariba su cabez.

Juez Mr. v.d. Griendt a duna sentencia un vez conforme cu peticion di fiscal.



CLUB VISAGE PRESENTS
[CRAZY SUNDAY]
FLS 2.000.00
IN CASH PRIZES
WINNER TAKES ALL

HAVE
FUN

STARTING at 6:00 p.m.
BILLIARDS TOURNAMENT (fls.500,00)
STARTING at 10:00 p.m.
ARM WRESTLING (fls.500,00)
STARTING AT 12:00 midnight.
ROCK & ROLL DANCE CONTEST (fls.500,00)
STARTING at 3.00 a.m.
DOOR LOTO (Fls.500,00)

DIARIO

E MATUTINO DI
PUEBLO